

# Atuagarsuarni allattuisarneq aamma atinik allannguinermi uppernarsaatillu ilaasa tunniunnerini akiliuteqartarneq pillugit Namminersorlutik Oqartussat nalunaarutaat

Ilageeqarneq pillugu Inatsisartut inatsisaanni nr. 9, 19. maj 2010-meersumi, Inatsisartut inatsisaatigut nr. 2, 29. november 2013-imeersutigut allanngortinneqartumi § 15, imm. 4 aamma § 26q naapertorlugit, biskoppimik isumaqtigiinninniareernermi aalajangersarneqarput:

## Kapitali 1

*Allattaavissuup atuuffia*

**§ 1.** Ilagiit atuagarsuarnik tunngaviusumik nalunaarsugassat ilagiinnilu suliarineqartut nalunaarsorneqarnerannut atorneqassaaq, tak. imm. 2 aamma 3.

*Imm. 2.* Pisut tunngaviusumik nalunaarsugassat tassaapput inunngortut, atsiinerit, atinik allannguinerit toqusullu.

*Imm. 3.* Ilagiinni suliarineqartartut tassaapput kuisittoqartarnera, apersortittoqartarnera, katittooqartarnera ilisoqartarneralu.

**§ 2.** Nalunaarsugassanut ilagiinnilu suliarineqartartunut tunngatillugit pisusanut atuagarsuarmut allattusoqassaaq, taamaattoq tak. imm. 2 aamma 3, § 3 aamma § 10, imm. 1.

*Imm. 2.* Kommunit aggorneqarnerisa avataanni pisut nalunaarsugassat ilagiinnilu suliarineqartut Palaseqarfik Nuummi allattaavissuarmut allattorneqassapput.

*Imm. 3.* Pituffimmi pisut nalunaarsugassat ilagiinnilu suliarineqartut Palaseqarfik Qaanaami allattaavissuarmut allattorneqassapput.

**§ 3.** Atsiinerit, taakkununnga ilanngullugit kuisitsinerit atinillu allannguinerit, taakkununnga ilanngullugu katittooqarneranut tunngasut najukkami piumasaqaatit naapertorlugit atuagarsuarmut allattorneqassapput, tassa inuit qinnuteqarnerup nalaani Kalaallit Nunaanni najugaqartut kisimik atuagarsuarmut allattorneqassapput, taamaattoq tak. § 10, imm. 1.

## Kapitali 2

*Ilagiit atuagarsuata immikkoortiterneqarnera*

**§ 4.** Ilagiit atuagarsuat tassaavoq pingaarnertut atuagaq aamma paasissutissanik isumannaallisaavik, imaraalu:

- a) Inunngortunik kuisittunillu allattuiffik.
- b) Apersortittunik allattuiffik.
- c) Katittunik allattuiffik.
- d) Toqusunik allattuiffik.

*Imm. 2. Allagaatit ilagiit atuagarsuannut ilanngussinermut tunngaviusut ilagiit atuagarsuannut ilanngussatut taaneqartarput.*

### Kapitali 3

#### *Inunngortunik kuisittunillu allattuiffik*

**§ 5.** Inunngortunik kuisittunillu allattuiffimmi nalunaarsorneqassapput:

- 1) Inunngortut, angajoqqaani pissutsit, atsiinerit, kuisittut aamma atinik allannguinerit katinnermit pisuunngitsut.
- 2) Kalaallit Nunaanni Ilagiinnut ilaasortangortut ilaasortaajunnaartullu pillugit paasissutissat.
- 3) Qitornavissiartaarnissaq aamma atinik allannguinerit katinnermit pisuunngitsut pillugit Rigsombudsmandimit akuerineqartut.
- 4) Inatsisit naapertorlugit katinnikuunani atinik allannguinerit, aamma Kalaallit Nunaata avataani atinik allannguinerni takussutissanik upternarsaanerit.

**§ 6.** Inunngortunik nalunaarsuineq oqartussatut piginnaatinneqartumit paasissutissat tunniunneqartut naapertorlugit nalunaaruteqartoqarneranit tulleriaalarluni pissaaq.

*Imm. 2. Katissimanngitsut meerartaarpata meeqqap ataataanik nalunaarsuisoqassaaq ataataasoq Politimesterip akuerippagu imaluunniit ataatassarsiuussineq eqqartuussivikkortitsinerannilu journalip normua ullaorlu suliarinniffiusoq pillugit ilagiit atuagarsuata nalunaarsuisarfiani nalunaarutigineqassapput.*

*Imm. 3. Nalunaarsuisoqareernerani palasi ilagiit atuagarsuannut allattuisoq inunngorfimmi kommunip inunnik allattorsimaffianut inunngortoq pillugu nalunaaruteqassaaq. Anaanaasoq kommunimi allami najugaqarpat kommunimi tassani inuit allattorsimaffiannut nalunaaruteqartoqassaaq.*

*Imm. 4. Qitiusumik Inuit Nalunaarsorsimaffiata meeqqap normua pillugu paasissutissartaa kommunimi inuit allattorsimaffiannit pissarsiarineqassaaq ilanngunneqarlunilu.*

**§ 7.** Atsiinerup kuisinnerullu nalunaarsorneqarnera meeqqap inunngorsimanermut kuisissimanermullu uppernarsaataanut ilanngunneqassaaq.

*Imm. 2. Nunaqarfinni ilagiinnut allattaavissuaqanngitsuni kuisittoqartillugu kuisinneq palaseqarfimmi palasimut ilagiit atuagarsuannut allattuisussamut ingerlaannaq nalunaarutigineqassaaq.*

*Imm. 3. Meeraq katissimanngitsunik angajoqqaalik ataataasup kinguliaa atorlugu pinartutut kuineqartoq Politimesterip akuersineratigut ateq kuissutaasoq atorlugu ilagiit atuagarsuannut ingerlaannaq ilanngunneqassaaq.*

*Imm. 4. Kinaluunniit atermik akuerineqarsimanngitsumik atilik ilagiit atuagarsuannut ilanngunneqarsinnaannnilaq. Nunaqarfinni kuisitsinissaq sioqqullugu ataataasoq pillugu paasissutissanik*

aamma atermik akuersissuteqarnissamik qinnuteqaatit palasimut ilagiit atuagarsuannut allattuisussamut allaganngorlugit nassiunneqassapput.

*Imm. 5. Inunngorfimmi nalunaarsuiffiusumi pinnani palaseqarfimmili allami atsiisoqarpat imaluunniit kuisittoqarpat atsiineq kuissutaasorluunniit atsiiffiusumi imaluunniit palaseqarfimmit kuisitsisumi pineqartup inunngorsimaneranut kuisissimaneranullu uppernarsaatissaani nr. "0"-up nalaani atsiineq kuissulluunniit nalunaarsorneqassaaq. Tamanna pereerpat atsiineq kuisitsinerluunniit inunngornermi nalunaarsuiffimmut nalunaarutigineqassaaq.*

*Imm. 6. Nalunaarsuisoqareerpat palasi ilagiit atuagarsuannut allattuisoq sumiiffimmi atsiiffiusumi imaluunniit kuisiffiusumi inuit allattorsimaffiannut nalunaarutiginnissaaq. Anaanaasoq kommunimi allami najugaqarpat kommunimi tassani inuit allattorsimaffiannut nalunaaruteqartoqassaaq.*

**§ 8.** Atinik allannguinermi nalunaarsuineq, katinnermi atinik allannguineq pinnagu, pissaaq palaseqarfimmut qinnuteqartup inunngornermi, kuisinnermi imaluunniit atsiinermeri nalunaarsorsimaffigisaanut allakkatigut qinnuteqartoqareerneratigut. Atinik allannguineq aamma Rigsombudsmandip atinik uppernarsaammik nassisserereratigut nalunaarsorneqassaaq.

*Imm. 2. Meeqqat atiinik allannguinermi nalunaarsuineq aamma pissaaq angajoqqaatut oqartussaasuni pissutsinik tamarmiusunik uppernarsaasiinikkut, aamma meeraq 12-inik ukioqalereersimappat tamatigut toqqaannartumik ilangunneqartassaaq imaluunniit ukiui piginnaasaalu naapertorlugit nalilerneqarpat suliaph suliarineqarneranut ilangunneqassasoq.*

*Imm. 3. Atinik allannguineq taamaallaat ilagiit atuagarsuannut ilangunneqassaaq atit Oqaasiliortunit imaluunniit atinik akuersisartunit akuersissutigineqarsimappata.*

*Imm. 4. Nalunaarsuisoqareerpat palasi ilagiit atuagarsuannut allattuisoq kommunimi qinnuteqartup inunngornermi, kuisinnermi imaluunniit atsiinermeri nalunaarsorsimaffigisaani inuit allattorsimaffiannut nalunaaruteqassaaq. Qinnuteqartoq kommunimi allami aalajangersimasumik najugaqarpat nalunaarut kommunimi tassani inuit allattorsimaffiannut tunniunneqassaaq.*

**§ 9.** Qitornavissiartaarnissaq aamma atinik allannguinerit katinnermit pisuunngitsut pillugit Rigsombudsmandimit akuerineqartut nalunaarsorneqassapput sumiiffimmi qinnuteqartup tunngaviusumik nalunaarsorneqarfiani.

*Imm. 2. Rigsombudsmandip akuersissuteqarnerata journalip normua, inatsisitigut tunngavia ullulerneqarneralu ilagiit atuagarsuata nalunaarsuisarfiani allanneqassapput.*

**§ 10.** Inatsisit naapertorlugit katinnikuunani atinik allannguinerit, aamma Kalaallit Nunaata avataani atinik allannguinerni takussutissanik uppernarsaanerit pissapput sumiiffimmi qinnuteqartup tunngaviusumik nalunaarsorneqarfiani.

*Imm. 2. Nalunaarsuisoqartinnagu atit allannguutaat Oqaasiliortunut akuerisassangorlugit saqqummiunneqassapput. Aqqit innuttaasumut nalinginnaasumik narrujuummisitsisinnaasut akuerineqarsinnaanngillat.*

*Imm. 3. Oqartussaasutut akuersissuteqartup Kalaallit Nunaata avataaneersup aqqa suliaatalu normua, Oqaasiliortullu akuersissuteqarnerannut journalip normua ullulerneqarneralu ilagiit atuagarsuata nalunaarsuisarfianut allanneqassapput.*

**§ 11.** Kalaallit Nunaanni Ilagiinnut ilaasortanngorneq ilaasortaajunnaarnerluunniit allakkatigut qinnuteqartoqareerneratigut nalunaarsorneqassapput.

*Imm. 2.* Nalunaarsuisoqareernerani palasi ilagiit atuagarsuannut allattuisoq kommunimi qinnuteqartup qinnuteqarfingisaani inuit allattorsimaffiannut nalunaaruteqassaaq. Qinnuteqartoq kommunimi allami aalajangersimasumik najugaqarpat nalunaarut kommunimi tassani inuit allattorsimaffiannut tunniunneqassaaq. Qinnuteqartoq allami inunngorsimanermut kuisissimanermullu allattorneqarsimappat nalunaarsuiffimmut tamanna aamma nalunaarutigineqassaaq.

#### Kapitali 4

*Apersortittunik allattuiffik*

**§ 12.** Apersortittunik allattuiffimmi apersortittut nalunaarsorneqassapput.

**§ 13.** Illoqarfinni nunaqarfinnilu ilagiinnut allattaavissuaqanngitsuni apersortittut palaseqarfimmi palasimut ilagiit atuagarsuannut allattuisartumut piaartumik nalunaarutigineqassapput.

#### Kapitali 5

*Katittunik allattuiffik*

**§ 14.** Katittunik allattuiffimmut nalunaarsorneqassapput:

- 1) Oqaluffimmi katittut.
- 2) Ilagiit pisortat katitsissimasaannik akuersissuteqarnerat.
- 3) Katinnerup nassataanik atinik allannguinerit, tassunga ilanngullugu nammineq kinguliarisamik atueqqilerneq.

**§ 15.** Pisortat katitsissimasaannik akuersissutinik nalunaarsuineq pissaaq pineqartut ilagiit atuagarsuanni nr. "O"-up nalaani.

**§ 16.** Katinnerup nassataanik atinik allannguinerit, tassunga ilanngullugu nammineq kinguliarisamik atueqqilerneq nalunaarsorneqassapput palaseqarfimmut qinnuteqartup katiffigisimasaanut allakkatigut qinnuteqareernerani, aamma tamanna pillugu maleruaqqusat atuuttut malillugit.

*Imm. 2.* Atinik, taaguutaanngitsutut atinik allannguinerit aamma inuit katissimasut namminneq kinguliaminnit allamik kinguliaqalerlutik allannguisimasut ilagiit atuagarsuanni marloriaammik atimik allannguinertut nalunaarsorneqassapput, tassani allannguut § 8 malillugu nalunaarsorneqassaaq, kingusinnerusukkullu katittunik allattuiffimmi nalunaarsuinissaq aamma upternarsaammik tunniusseqqinnissaq siunertaralugit sumiiffimmut katiffigisamut nalunaarutigineqassalluni.

#### Kapitali 6

*Toqusunik allattuiffik*

**§ 17.** Toqusunik allattuiffimmi nalunaarsorneqassapput:

- 1) Toqusut ilisaasullu.

2) Arsat siammarlugit kuineqartussatut biskoppimit akuerineqartut.

3) Arsanik qummuattaniittunik ilisinerit.

*Imm. 2. Ilisinermi issumeerinnittarneq ileqqoq akuerisaasoq malillugu ingerlanneqassaaq.*

**§ 18.** Toqusut taakkulu ilisaaneri tamarmik palaseqarfimmi pisoqarfiusumi toqusunik allattuiffimmi nalunaarsorneqassapput.

*Imm. 2. Toqusunik allattuiffimmi aamma nalunaarsorneqassapput inunniq palaseqarfiuup avataani toqusimasunik ilisinerit. Aalajangersagaq taanna malillugu ilisinerit pineqartup ilagiit atuagarsuanni inigisaani nr. "O"-up nalaanut allanneqassapput.*

**§ 19.** Arsanik siammerisoqartillugu pineqartut ilagiit atuagarsuanni inigisaanni "O"-up nalaanut allanneqassapput aamma arsanik siammerinermi piffissaq sumiiffillu biskoppip allakkatigut akuersissutaanik journalip normuanillu ilallugit nalunaarutigineqassapput.

**§ 20.** Arsanik qummuattaniittunik ilisinerit pineqartut ilagiit atuagarsuanni inigisaasa nalaanni nr. "O"-up nalaanut allanneqassapput.

## Kapitali 7

*Ilagiit atuagarsuaanik aqutsisut*

**§ 21.** Ilagiit atuagarsuat palasimit ilagiit atuagarsuannik aqutsisumit nammineerluni aqunneqassaaq, taamaattoq tak. imm. 5.

*Imm. 2. Paasissutissanik isumannaallisaavik palasimit sulisumit allamit, ajoqitut ilinniagalimmit imaluunniit inummit ilagiit atuagarsuannik ingerlatsinissamut pikkorissarsimasutut biskoppimit akuerisaasumit aqunneqassaaq, taamaattoq tak. imm. 3-5.*

*Imm. 3. Paasissutissanik isumannaallisaavik ajoqimit pikkorissarsimanani atuaasartumit biskoppip piginnaatisinera malillugu ingerlanneqarsinnaavoq.*

*Imm. 4. § 26, imm. 1 naapertorlugu paasissutissanik isumannaallisaavik Nunatta Katersugaasivianut Allagaateqarfianullu tunniunneqarpat, pingarnertut allattaavimmut ilanggussat pillugit nalunaarut malillugu paasissutissanik isumannaallisaavimmut ilanggussisoqassaaq.*

*Imm. 5. Biskoppi immikkut illuinnartunik pisoqartillugu allat, tigussaasumik nalinginnaasumilluunniit ilagiit atuagarsuannik ingerlatsinissaannut akuersisinnaavoq.*

*Imm. 6. Kialluunniit pisoq ataaseq pingarnertut allattaavimmut paasissutissanillu isumannaallisaavimmut allattorsinnaanngilaa.*

## Kapitali 8

*Ilagiit atuagarsuannut akisussaaneq allattaavissuarmillu nakkutilliineq*

**§ 22.** Palasi ilagiit atuagarsuannik aqutsisuuusoq palaseqarfimmi ilagiit atuagarsuannut akisussaasuuvoq, tassunga ilanggullugu ilagiit atuagarsuannut tunngatillugu maleruaqqusassatut aalajangersakkat naapertorlugin peqqissaartumik ingerlanneqarnissaanut akisussaaneq.

*Imm. 2. Ukiut tamaasa septemberip qaammataani palasi allattaavimmi pingarnerni paasissutissanik*

pingaarnerni suliaqartup oqaloqatigiissutigisarpa.

*Imm. 3. Ukiut tamaasa kingusinnerpaamik ulloq 30. september palasip ilagiit allattaavissuannik aqutsisup provstimit nalunaarutigisarpa oqaloqatigiinnejq pisimasoq aamma iluarsiissuteqarnissamut qanoq annertutigisumik tunngavissiinersoq.*

**§ 23.** Ilagiit atuagarsuannik aqutsineq provstimit nakkutigineqassaaq biskoppimillu qaavatigut nakkutigineqassalluni.

*Imm. 2. Minnerpaamik ukioq allortarlugu provstip ilagiit atuagarsuannik nakkutilliinissaq misissuinissarlu siunertaralugit palaseqarfut misissuiffigissavai. Provstip ilagiit atuagarsuannik nakkutilliineranit angusat ukiumoortumik nakkutilliinermi nalunaarusianngorlugit eqiterneqassapput, nalunaarusiaq biskoppimut kingusinnerpaamik ulloq 31. december nalunaarutigineqassaaq. Nakkutilliinermi nalunaarusiaq palaseqarfimmik immikkoortiterneqassaaq aamma atuakkat ataasiakkaat ulloq misissorneqarfiat ilanngullugu allanneqassallutik. Nakkutilliinermi nalunaarusiap aamma imarissavai ilagiit atuagarsuannut tunngatillugu pissutsit nalinginnaasut pilersitsisinnaanermut sulinummik nalunaarutitallit pillugit ataatsimoortumik provstip inassuteqaatai.*

*Imm. 3. Provstip nakkutilliinera immikkut ittumik oqaaseqaateqarnissamut tunngavissiippat, taakku ernerluni biskoppimut nalunaarutigineqassapput.*

*Imm. 4. Biskoppip tamanna Naalakkersuisunut nalunaarutigissavaa, tassa nalunaarut manna naapertorlugu ilagiit atuagarsuannik aqutsinissamut piumasaqaatit Kalaallit Nunaanni Ilagiit sumiiffinni pissutsit naapertornagit imaluunniit piviusorsiunngitsumik malinngippatigit.*

*Imm. 5. Biskoppip ilagiit atuagarsuat inatsisnut allanut, taakkununnga ilanngullugu inunnik nalunaarsuiffik pillugu inatsimmut naapertuuttuunersoq nakkutigissavaa.*

## Kapitali 9

*Ilagiit atuagarsuannik atuilerneq, toqqorsisarneq tunniussisarnerlu*

**§ 24.** Provstip ilagiit atuagarsui nutaat atorneqalersinnagit atsiornermigut akuerissavai.

**§ 25.** Pingaarnertut allattaavik aamma paassisutissanik isumannaallisaavik immikkoortillugit sikaavinnut parnaaqgasunut ikuallajaatsunullu toqqorneqassapput.

**§ 26.** Pingaarnertut allattaavik Nunatta Katersugaasivia Allagaateqarfialu isumaqatigiissuteqarfingereerlugu ilanngussinerup kingulliup kingorna ukiut 100-t qaangiunneranni Nunatta Allagaateqarfianut tunniunneqassaaq. Paassisutissanik isumannaallisaavik Nunatta Katersugaasivia Allagaateqarfialu isumaqatigiissuteqarfingereerlugu ilanngussinerup kingulliup kingorna ukiut 50-it qaangiunneranni Nunatta Allagaateqarfianut tunniunneqassaaq.

*Imm. 2. Paassisutissanik isumannaallisaaviup Nunatta Allagaateqarfianut tunniunneqareernerani pingaarnertut allattaavimmut ilanngussat paassisutissanik isumannaallisaavimmut allattorneqarnissaat siunertaralugu Nunatta Allagaateqarfia nalunaarfingineqassaaq.*

## Kapitali 10

*Ilagiit atuagarsuannut ilanngussat aamma ilagiit atuagarsuini aaqqiinerit*

**§ 27.** Nalunaarsugassat ilagiinnilu suliarineqartut pillugit pisortatut oqartussaasut nalunaarutaannik tigusiniariarluni ilagiit atuagarsuannut ilanggussisoqassaaq.

*Imm. 2.* Ilangussat nalunaaruteqartoqarneranit, soorlu ilagiinni suliarineqartut pillugit, kingusinnerpaamik ullaqtuq qaloruq qaaqunneq ilagiit atuagarsuannut allattorneqanngitsut tunngavilersuutitaqanngitsumik provsttimut nalunaarutigineqassapput, taassuma ernertumik ilanggussisoqarnissaa nakkutigissavaa pissutsillu immikkut ittumik biskoppimut nalunaarutigalugit.  
*Imm. 3.* Ilagiit atuagarsuannut ilangussat taamaallaat kuglepennimik tungujortumik qernertumilluunniit allanneqassapput.

**§ 28.** Ilagiit atuagarsuanni iluarsiinerit biskoppimut tigussaasumik allakkatigullu akuerineqartussaapput. Iluarsiineq tassaavoq pingarnertut atuagarsuarmi imaluunniit paasissutissanik isumannaallisaavimmi allanguinerit ilangussinerilluunniit tamarmik.

## Kapitali 11

*Ilagiit atuagarsuinut ilangussanik allattuineq toqqorsisarnerlu*

**§ 29.** Ilagiit atuagarsuinut ilangussat allattorneqassapput palaseqarfullu allaffiani inissinneqarlutik, § 4, imm. 1 naapertorlugu ilagiit atuagarsuanni atuakkat sisamat malillugit sammisanut immikkoortiterneqassapput aamma ukiut suliarineqarneri malillugit immikkoortiterneqassapput.

*Imm. 2.* Atinik allanguinernut tunngatillugu ilangussat allattorneqassapput inunngorermullu aamma kuisinnermut tunngatillugit ilangussanit allanit immikkoortillugit erseqqissumik "atit allanguutaat" allallugit inissinneqarlutik.

**§ 30.** Ilagiit atuagarsuinut ilangussat ukiup ilangussanik tigusiffiup naaneranit ukiuni tallimani toqqortaatigineqassapput, tamatumalu kingorna aserorterlugit atorunnaarsinneqassallutik, taamaattoq tak. imm. 2-3.

*Imm. 2.* Atinik allanguinernut tunngatillugu ilagiit atuagarsuanut ilangussat ukiup ilangussanik tigusiffiup naaneranit ukiuni 30-ni toqqortaatigineqassapput, tamatumalu kingorna aserorterlugit atorunnaarsinneqassallutik.

*Imm. 3.* Ukioq 1963 sioqqullugu Kitaani katissimanngitsut meeraannut tunngatillugit aamma ukioq 1974 sioqqullugu Avannaani Tunumilu katissimanngitsut meeraannut tunngatillugit ataataasunik ataatsimullu nalunaarutit biskoppimut ernertumik tunniunneqassapput.

## Kapitali 12

*Ilagiit atuagarsuannit nalunaarutit, uppernarsaatinik tunniussinerit takussutissiallu*

**§ 31.** Nalunaarummi matumani pisut aallaavigalugit Kalaallit Nunaanni Ilagiit pisortatullu oqartussaat akornanni nalunaaruteqarnermi, tassunga ilangullugu akissuteqarnermi immersugassat biskoppimut innersuussutigineqartut atorneqassapput.

**§ 32.** Uppernarsaatit akuerisaasut atorneqartussaatillugit ilagiit atuagarsuannit uppernarsaatinik biskop tunniussissaq. Uppernarsaatit immersorneqassapput skrivemaskiina atorlugu imaluunniit qarasaasiami atortoq aqqutigalugu.

*Imm. 2.* Uppernarsaatit tunniunneqassapput pingaarnertut allataavimmi takussutissat aallaavigalugit.

*Imm. 3.* Uppernarsaatit palasimit atsiorneqassapput imaluunniit sumiiffimmi ajoqimit ilinniarsimasumit imaluunniit biskoppip allakkatigut akuersissutigeriigaannit. Uppernarsaatit palaseqarfipup pisortatigoortumik oqartussaasutut naqitsissutaanik naqinnejqassapput.

**§ 33.** Kinaluunniit 12-inik ukioqalereersimasoq imaluunniit paasissutissanik tigussaasumik soqutigisaqartoq allakkatigut qinnuteqareernermini kinaassutsiminillu uppernarsaammik tunniussereernermini pisinnaatitaavoq ilagiit atuagarsuannit imminut tunngassuteqartunik takussutissianik pissarsinissamut.

*Imm. 2.* Allakkatigut qinnuteqareernermini eqqarleriinnermillu uppernarsaammik tunniussereernermini qinnuteqartoq pisinnaatitaavoq angajoqqaat toqoreersimasut pillugit ilagiit atuagarsuannit takussutissianik pissarsinissamut.

*Imm. 3.* Qinnuteqartup angajoqqaavinut toqoreersimasunut tunngassuteqanngitsunik allanilli ilagiit allattaavissuannit takussutissianik pissarsiartoqarpat biskoppip allakkatigut akuersissuteqarnissaq pisariaqarpooq. Tamatumunnga qinnuteqaat sumiiffimmi qinnuteqarfusumi palasi ilagiit allattaavissuannik aqutsisoq aqqutigalugu biskoppimut tunniunneqassaaq.

**§ 34.** Ilagiit allattaavissuannit takussutissiaq uppernarsaatitut akuerisaasutut palasimit namminermit tunniunneqassaaq.

## Kapitali 13

### Akiliutit

**§ 35.** Kapitalimi matumani maleruaqqusat atorneqassapput Kalaallit Nunaanni Ilagiit aqqutigalugit atimik allannguiniarluni qinnuteqartoqarnerani, uppernarsaatinik tunniusseqqinnermi kiisalu Ilagiit uppernarsaataasa ilaannik tunniussinermi.

*Imm. 2.* Ilagiinni suliarineqartut suliamorpiaq atatillugu akeqanngitsumik uppernarsarneqassapput. Kingusinnerusukkut uppernarsaasiineremi imaluunniit uppernarsaaseeqqinnermi §§ 36-41-t naapertorlugit akiliuteqartoqassaaq.

### Atimik allannguineq

**§ 36.** Atimik allannguiniarluni qinnuteqarnermi 300 kr.-nik akiliuteqartoqassaaq. Taamaattoq akeqanngillat:

1) Angajoqqaat katinnermikkut atertaavat tunngavigalugu atimik allannguineq imaluunniit nammineq kinguliarisamit atueqqilerneq.

2) Angajoqqaarsiat kinguliaannik atuilerneq imaluunniit kingullermik kinguliarisamik atueqqilerneq.

*Imm. 2.* Akiliuteqartitsisarneq qinnuteqaatip akuerineqarsinnaaneranut attuumassuteqanngilaq.

## *Tunniusseqqinneaq*

**§ 37.** Uppernarsaatit uku tunniuteqqinnejneranni 150 kr.-nik akiliuteqartoqassaaq:

- 1) Inunngornermut aamma kuisinnermut allagartaq.
- 2) Inunngornermut aamma atinut uppernarsaatit.
- 3) Inunngornermut allagartaq.
- 4) Katinnermut uppernarsaat.
- 5) Toqunermut ilisaanermullu uppernarsaat.

## *Oqaatsit marluk atorlugit uppernarsatinik tunniussineq*

**§ 38.** Uppernarsatinik kalaallisut tuluttullu allassimasunik (oqaatsit marluk atorlugit uppernarsaatit) tunniussinermi 150 kr.-nik akiliuteqartoqassaaq.

## *Qinnuteqaat akileeqqusisarnerlu*

**§ 39.** Atimik allannguinissamik qinnuteqaat, inunngornermut kuisinermullu uppernarsaammik tunniussineq, tak. § 5 nr. 4, aamma uppernarsatinik tunniusseqqinnej aamma oqaatsit marluk atorlugit uppernarsaammik tunniussineq palaseqarfimmut qinnuteqartup aalajangersimasumik najugaqarfingisaanut imaluunniit palaseqarfimmut inunngornermi imaluunniit kuisinnermi nalunaarsorneqarfiusumut nassiunneqassapput.

**§ 40.** Atimik allannguinissamut qinnuteqaatip tunniunneqarneranut atatillugu aamma uppernarsaatip tunniuteqqinnejnissaanik kiisalu oqaatsit marluk atorlugit uppernarsaammik tunniuneqarnissaanik piumasaqarnermi girokontomut imaluunniit aningaaserivimmi kontomut biskoppip innersuussutaanut akiliuteqartoqassaaq.

**§ 41.** Akiliutigisaq nunatta karsianut nakkartinneqassaaq.

## *Kapitali 14*

### *Atuutilerfia*

**§ 42.** Nalunaarut ulloq 1. oktober 2015 atuutilerpoq.

*Namminersorlutik Oqartussat, ulloq 14. september 2015*

Nivi Olsen

/

Mikael Kristensen

**Namminersorlutik Oqartussat**

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut